

Bosnia and Herzegovina
Federation of Bosnia and Herzegovina

CANTON SARAJEVO
Ministry of Labour, Social Policy, Displaced
Persons and Refugees

Broj: 13-04/2-32187-26/20
Sarajevo, 23.09.2020. godine

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO

- **SKUPŠTINA KANTONA SARAJEVO**
Služba za skupštinske poslove
- **OVDJE** -

- **VLADA KANTONA SARAJEVO**
Stručna služba Vlade
- **OVDJE** -

Predmet: Odgovor na zastupničko pitanje, dostavlja se

Zastupnica Danijela Kristić, je na 28. Radnoj sjednici Skupštine Kantona Sarajevo, održanoj dana 20.08.2020. godine, u okviru tačke Dnevnog reda "Poslanička/zastupnička pitanja, inicijative i odgovori", a u skladu sa Poslovníkom Skupštine Kantona Sarajevo, postavila zastupničko pitanje kako slijedi:

"1. Da li su doneseni Zaključci usvojeni na 43. radnoj sjednici Skupštine Kantona Sarajevo 25. juna 2018. godine na inicijativu Udruženja dijabetičara djece i omladine Kantona Sarajevo obavezujući?

2. Ako su obavezujući koje institucije su dužne provesti Zaključke Skupštine?

3. Da li provodite provođenje zaključaka Skupštine i na koji način?


4. Ukoliko su zaključci obavezujući da li poduzimate sankcije u slučaju nepoštivanja?

5. Šta ćete učiniti ako se utvrdi da institucije koje su zadužene za provođenje Zaključaka Skupštine Kantona Sarajevo od 25. juna 2018. godine nisu to uradile ili su to uradile djelimično?

6- Da li ćete imati dati rok da to provedu ili sankcionisati odgovorne?"

Na navedena zastupnička pitanja, dajemo sljedeći odgovor:

Na 43. Radnoj sjednici Skupštine Kantona Sarajevo održanoj dana 25. juna 2018. godine, vezano za inicijativu Udruženja dijabetičara djece i omladine Kantona Sarajevo, jednoglasno su



web: <http://mrsri.ks.gov.ba>
e-mail: mrsri@mrsri.ks.gov.ba
Tel: + 387 (0) 33 562-089. Fax: + 387 (0) 33
562-090
Sarajevo, Reisa Džemaludina Čauševića 1



doneseni Zaključci (4 zaključka), koji su se odnosili na obaveze Zavoda zdravstvenog osiguranja Kantona Sarajevo prema pacijentima inzulo-ovisnicima.

Navedeno proizilazi iz stenograma Zapisnika sa 43. Radne sjednice Skupštine Kantona Sarajevo u kojem su navedeni ovi Zaključci. Iz stenograma je takođe vidljivo da se vezano za naprijed navedenu inicijativu Udruženja dijabetičara djece i omladine Kantona Sarajevo zastupnicima nekoliko puta obratila tadašnja ministrica zdravstva u Vladi Kantona Sarajevo, Zilha Ademaj, a da je Zaključke predložio Kolegij Skupštine Kantona Sarajevo u čijem radu su učestvovali pored ministricе zdravstva i direktor Zavoda zdravstvenog osiguranja Kantona Sarajevo.

Dio stenograma sa 43. Radne sjednice održane dana 25. juna 2018. godine sa Zaključcima, koji se odnosi na naprijed navedeno, dostavljamo Vam u prilogu.

Kako se dakle ovi zaključci nisu odnosili na oblast iz resora Ministarstva za rad, socijalnu politiku, raseljena lica i izbjeglice Kantona Sarajevo, niti su ovo ministarstvo obavezivali na njihovo provođenje, to iz ovog razloga ne možemo odgovoriti na postavljena pitanja zastupnice Danijele Kristić.

S poštovanjem,

Prilog: Kao u tekstu

Pripremio: Zoran Timarac, šef odjeljen

Kontrolisao: Nuriya Hodžić, pomoćnik ministricе




MINISTRICA

Jasna Agić

Dostaviti:

1. Naslovu
2. a/a



web: <http://mrsri.ks.gov.ba>
e-mail: mrsri@mrsri.ks.gov.ba
Tel: + 387 (0) 33 562-089, Fax: + 387 (0) 33
562-090
Sarajevo, Reisa Džemaludina Čauševića 1



Quality management system
ISO 9001

- Customer focus
- Customer satisfaction
- Continous improvement
- System process effectiveness

ID: 15 109 63665

www.tuv-sued.com

1

Prije nego što pređemo na realizaciju prve tačke dnevnog reda obavezni smo da razmatramo Zapisnike sa Stenogramom sa 41. i 42. sjednicu Kantona Sarajevo, te bi trebali da se izjasnimo o zapisnicima.

Da li ima neko nekih primjedbi? Ako nema da se izjasnimo o **Zapisniku sa 41. Radne sjednice Skupštine Kantona Sarajevo**.

Pristupite glasanju. Zaključujem glasanje. Hvala lijepo. Zatvaram glasanje.

30 je bilo za, nitko nije bio protiv i nitko nije bio suzdržan.

b)

Sada se trebamo izjasniti o **Zapisniku sa 42. Radne sjednice Skupštine Kantona Sarajevo**.

Pristupite glasanju. Zaključujem glasanje.

30 je bilo za, protiv nije bio nitko i suzdržan nije bio nitko.

Konstatujem da je Skupština potvrdila Zapisnik i sa 41. i sa 42. Radne sjednice.

I sada evo da dozvolimo našim gostima da se obrate. Da li zastupnici, ustvari da se izjasnimo da se naši gosti sada obrate a ne kada bude redovna točka. Pristupite glasanju. Zatvaram glasanje.

29 je glasalo, protiv nije bio nitko i suzdržan nitko, te evo pozivam našeg gosta da se obrati. Izvolite. Predstavite nam se zbog stenograma i zbog javnosti.

Primarijus doktor Midhat Mujić:

Hvala na ukazanom vremenu. Ja sam Primarijus dr. Midhat Mujić, pedijatar, subspecijalista dijabetolog. Inače član Ekspertnog tima IBF krovne asocijacije za dijabetes Europe, za Jugoistočnu Europu, jedini iz BIH. Inače sam tvorac Rezolucije o dijabetesu koju je usvojio Parlament FBiH 2012 godine i napisao sam zajedno sa svojim kolegama strategiju borbe protiv dijabetesa 2014-2024. samo sam džaba pisao ništa se od toga ne radi i ništa se nije usvojilo. I moram priznati imao sam malo drugačije planiran nastup međutim kada sam pogledao predloženi Nacrt uredbe koju je dostavljen ortopedskih pomagala moram reći da sam se jako razočarao i od inicijative ako se bude ta uredba usvojila nema ništa. Na žalost dolaze još crnji dani za djecu s dijabetesom i mlade, jer ne da su proširena ta prava, nego su čak i još više uskraćena. Međutim ja ću pročitati ono što sam planirao. Nadam se da ćete me shvatiti, saslušati i da ćete prije svega kao ljudi razmisliti. Ovaj inicijativa je već usvojena u nekim gradovima, kao što je u Tuzli Gradsko vijeće Tuzle, a već s dakle realizovana inicijativa za kontinuiranim mjeračem glukoze u Tešnju, Bugojnu, Živinicama. U SBK je ove godine za djecu kupljeno 20 inzulinskih pumpi, a pored trakica iz Federalnog zavoda im je odobreno još 5 trakica iz kantonalnog zavoda. Kao pedijatar dijabetolog, a i sam dijabetičar pokušat ću vam približiti život djece, najugroženijih grupa sa šećernom bolesti. To su punoljetni učenici, studenti, oboljeli na terapiji inzulinskim pumpama i trudnice. Osoba sa dijabetesom svakih 20 minuta pomisli na svoju bolest, koliki je šećer, da li smije jesti, šta pojesti, koliko inzulina dati, hoće li uzeti dodatni obrok, smanjiti dozu inzulina ako dijete ima danas u školi čas tjelesnog odgoja. U našem društvu postoje zablude koje proističu iz neznanja o dijabetesu kod djece. Za razliku od dijabetesa odraslih, to je tzv. inzulini ovisni dijabetes koji obuhvata manje od 5% svih oboljelih, koji je najteži oblik dijabetesa koji zahtjeva doživotnu primjenu inzulina. Nakon četiri do pet uboda dnevno. I samokontrolu šećera 6 do 10 puta dnevno. I pored tih 10 do 12 uboda dnevno, imamo česte oscilacije glikemije i akutne komplikacije. Hipoglikemija izrazito nizak nivo šećera u krivi, ili

ketoacidoza, izrazito visok nivo šećera u krvi. Ukoliko roditelji ne prepoznaju komplikacije na vrijeme i ne reaguju mogu nastat ozbiljne posljedice po zdravlje djeteta ili završiti smrtnim ishodom. Zbog nerazumijevanja nadležnih institucija djeca nemaju pravo na glukagon i ketonske trakice. Hoćemo da vjerujemo da to se radi iz neznanja, ali nije to urađeno svjesno zbog navodne uštede. Za djecu i najugroženije iznos tih sredstava za glukagon i deset trakica za ketone godišnje iznosi oko ukupno 25.000 KM. Odnosno otprilike 10.000 KM za glukagon i 10.000 KM za ketonske trakice. Zbog tog iznosa je ugrožen život najmlađih u Sarajevu i Budžet Kantona Sarajevo. Da li vi možete zamisliti bol djece i njihovih roditelja kod svakog tog uboda? Moraš izmjeriti šećer ili dati inzulin dok te srce boli ti moraš uz gorki osmijeh i skrivene suze ubijediti dijete da to mora, i tako 10 do 12 puta dnevno, 350 mjesečno. Godišnje preko 4000 puta. To je njihova realnost. A ne mora biti tako jer imamo kontinuirane mjerače glukoze i inzulinske pumpe. Zahvaljujući njima djeca se mogu bosti 10 do 15 puta mjesečno. Da li ste vi svjesni šta to znači djeci i njihovim roditeljima? Manje boli, manje suza, bolju regulaciju bolesti, sedam puta manje hroničnih i skupih komplikacija na očima, bubrežima, srcu i drugih organima. Ako gledamo dugoročno, dobijamo radno sposobnog čovjeka, a uštede su nemjerljive jer 75% budžeta dijabetesa ide na liječenje komplikacija. Svi mi volimo svoju djecu i spremni smo učiniti sve za njih. Roditelji su prisiljeni da kupuju kontinuirane mjerače glukoze i senzore iz inostranstva gdje nisu registrovani u našoj zemlji. Ali dok se ne registruju odobrite barem interventni uvoz za da bi ljudi barem mogli legalno kupiti a ne ilegalno prenositi preko granice. U Hrvatskoj su senzori odobreni u augustu počinje njihova priprema. Ja ću usput reći, dakle postoji već jedan senzor registrovan u BIH, (nerazumljivo) koji se koristi u inzulinsku pumpu. A druga dva naravno treba samo ponovo registrovati, odnosno odobriti interventni uvoz. Ne želimo slušati da je realizacija inicijative skupa u odnosu na benefite koje donosi. Manje bolji, manje komplikacija, i dugoročno ogromne uštede. Nemojte razmišljati od mandata do mandata jer naša djeca trpe cijeli život. Dosta smo nepravdi istrpili i više ne možemo. Roditelji su finansijski iscrpljeni. Krajnje je vrijeme da zdravstvena zaštita djece s dijabetesom ima prioritet kao u Hrvatskoj i drugim zemljama regije. Da li znate da u Beogradu trudnice s dijabetesom dobiju pumpu dok ne iznesu trudnoću? Očekivali smo da će naša ministrica zdravstva reagovati nakon sastanka sa predstavnicima udruženja prošle godine. Tada smo dobili uvjeravanja da će se stanje promijeniti, da ćemo dobiti Glukagon preko recepta kao što se daje i hormon rasta, interesovali se za kontinuirane mjerače, interesovali se za registar dijabetičara itd. Na žalost, do sada nismo ništa vidjeli od toga iako ja vjerujem da ministrica to hoće i može, mislim da joj prije svega treba jedna stručna pomoć dakle ja nesebično se nudim za svaki puta vezano za dijabetes da pomognem u bilo kojoj oblasti i stojim na raspolaganju bez ikakve naknade naravno. Ja se samo nadam da ona neće ostati upamćena kao i svi drugi prethodni ministri jednostavno po Esencijalnoj listi lijekova koja se svake godine obogaćuje. Ne zaslugom ministrice nego zaslugom našeg Federalnog Ministarstva zdravstva koje pravi tu Esencijalnu listu lijekova i nameće kantonalnim ministarstvima. Međutim, samo Kanton Sarajevo poštuje tu listu i jedino u Kanton Sarajevo možete dobiti najskuplje moderne lijekove. Međutim, ono što je paradoks, šta će vam najskuplji i najbolji lijekovi kada vi nemate čime izmjeriti šećer i ne znate koliki vam je šećer prije nego što date inzulin ili uzmete lijek? Još sam primijetio u odgovoru ministrice prema zastupniku Harisu Plehi- ministrica je prihvatila inicijativu i predložila da se prebaci na federalni nivo. Mislim to, to bi bilo vjerujte onda katastrofa. Iskreno nama sve ovo liči na jedno odugovlačenje dok ne nastane ljetna pauza onda dolaze izbori, završi se mandat, i to je to. Mislim da ne bi smjeli to dopustiti, trebali bi se vi danas o tome jasno izjasniti. Ja ću reći samo, napomenuti da prebacivanje na federalni nivo nema nikakvog smisla zato što je Vlada FBiH na 88. svojoj sjednici početkom 2017 godine odbacila inicijativu zastupnice Alme Katane za inzulinske pumpe. Također koliko vidim odbačena je inicijativa zastupnice Segmedine Srne u Domu naroda za vraćanje Glukagona na A listu. Isto tako ministrica pošto

je radila u Federalnom zavodu zdravstvenog osiguranja jako dobro upoznata s tom problematikom i zna dobro koliko smo se mi bunili način izbora trakica za djecu i kako smo imali najjeftinije trakice i kada sam ja ušao u tu komisiju tražio sam da se uradi kriterij za kvalitet trakica djeci. Međutim na tenderu 2013 godine jedan od ponuđača se žalio i znate li koliko je trebalo da se riješi ta žalba? Pet godina. Dakle 24. maja 2018 godine je riješena ta žalba i pobijedili smo i naravno možemo imati trakice sada kvalitetnije nego što je do sada davano. Dakle dok federalni nivo prihvati ovu inicijativu naša djeca će imati svoju djecu. Toliko njima treba vremena. Pozivanje ministricе u odgovoru zastupnicima se traži mišljenje dijabetologa oko kontinuiranih mjerače šećera, koje je neophodno po mom mišljenju. Dovoljno to sve vidjeti kako su to uradili u susjednoj Hrvatskoj. Na kraju bih htio napomenuti da je premijer na prošloj sjednici podržao inicijativu, ali nadam se ne deklarativno, već konkretno. Ako je inicijativa ono što piše u nacrtu nove Uredbe onda bolje da je ne usvajamo. Molim zastupnike da bar ovaj put zaborave kojoj političkoj opciji pripadaju i prvi put od 2007 godine glasaju za unapređenje zdravlja i lakši život djece s dijabetesom, to će uraditi ako prihvate zaključke inicijative koje je predložilo Udruženje dijabetičara djece i omladine Kantona Sarajevo, i koje smo mi uručili gđinu Rađi i drugim zastupnicima koji su zainteresovani bili za ovu inicijativu. Ja ću vas samo jednu stvar zamoliti, djeca su tu ispred od jutros čekaju. Jedan dio djece je tu. Ja ću vas samo zamoliti kada budete raspravljali o inicijativi oni morat će ići dalje, samo nam nemojte molim vas više vrijeđati intervenciju kada o tome pričate. Mi dobro znamo ko je tu da bi ubirao političke poene, mi dobro znamo s kojim zastupnicima smo mogli razgovarati kada smo ih pozvali, znamo zastupnike koji su došli u naše udruženje, znamo one koji su sat i po mene slušali dok sam ja obrazlagao budžet dijabetesa u Kantonu Sarajevo kako bi trebao izgledati, i hvala im na tome. Dakle, mi znamo dobro gdje smo i kada smo uskraćeni za prava, i da ova inicijativa nije ni trebala da bude pokrenuta, da se poštovala Uredba koju ste zastupnici Kantona Sarajevo donijeli 2007 godine. Međutim, ona se nije poštovala. Ja ću samo napomenuti da u Uredbi član 23. točka 38 pod a) za djecu bi trebala biti odobrena dodatne trakice za mjerenje šećera- dakle ni jedno dijete do 18 godina deset godina od kada je usvojena ova Uredba nije dobilo ni jednu jedinu trakicu. I tu ste gospodo uštedili 531.000 KM za deset godina ako se uzme u obzir referalna cijena koju Zavod izdvaja za trakice. Dakle to je troškovi inicijative koju smo mi predložili. I finansijski obrazložili. Isto tako Zavod nije davao potrošni materijal za inzulinske pumpe niti refundirao sredstva od septembra 2014 godine do maja 2015 dok se mijenjao distributer. Dakle osam mjeseci im je trebalo da promijene distributera i u to vrijeme su uštedili 118.930 KM. A da napomenem da ne bi bilo zabune, neko će izaći i reći djeca dobivaju preko Federalnog zavoda. Da, dobivaju nedovoljan broj trakica, dobivaju nekvalitetne trakice i roditelji su prinuđeni da kupuju nove trakice. Neki od kantona u FBiH su svojoj djeci omogućili da imaju te dodatne trakice. Kao što je to SBK: isto tako hoću da napomene da u periodu od 2010 do 2015 godine tri godine nisu uopšte davane pumpe od strane ZZO iako je bilo dogovoreno sa timom inzulinske pumpe da to bude deset pumpi godišnje. I zbog toga su uštedili 168.412 KM. Sve je rađeno da se ukine ovaj vid terapije i moram reći i zahvaliti se gđinu Muhamedu Kozadri koji je to svojim uticajem spriječio inače mi danas ne bi pričali o inzulinskim pumpama. Zavod od 2010 godine ne radi po Uredbi koju je donijela Skupština Kantona Sarajevo vezano za potrošni materijal za inzulinske pumpe i njihovu zamjenu prilikom kvara već na osnovu mišljenja, iako se Zavod izjašnjava preporuke ne, ima mišljenja, mnogi su dobili zastupnici mišljenje tadašnjeg ministra zdravstva iz 2010 koji je dakle mimo znanja Skupštine Kantona Sarajevo prekršio Uredbu i ograničio potrošni materijal da se daje do 26 godine. Mnoga djeca su tada izgubila pravo na potrošni materijal, mnoga su skinula pumpe i to je bio cilj Zavoda uz ne davanje inzulinskih pumpi da se uguši ovaj vid terapije. Međutim, pogledajte u svijetu koliko se koristi inzulinska pumpa, kontinuirani mjerači glukoze, jer gledajući dugoročno to su ogromne uštede samo na komplikacijama. Dakle 75% troškova

budžeta za dijabetes ide na komplikacije. I na kraju dakle, od vašeg glasa ovisi kojim će načinom živjeti djeca s dijabetesom, težim ili lakšim. Nadam se da djeca nikada više neće doći pred ovu zgradu i čekati svoju budućnost. Molim vas kada ujutro ustanete sjetite se djece koja se moraju ujutro ubosti najmanje dva puta, da izmjere šećer i daju inzulin. Tada zagrlite svoju djecu i zahvalite Bogu što su zdrava i ako Bog da da ostanu zdrava. Hvala još jednom.

Predsjedateljica:

hvala lijepo uvaženi doktore Mujić. Mi nastavljamo s radom. To je prva točka dnevnog reda, a to su. Izvolite uvaženi zastupniče Čelik.

Poslanik/zastupnik Mirza Čelik:

zahvaljujem predsjedateljice. Pa ova tačka, ovo obraćanje ne bi samo trebalo da prođe način na koji smo evo sada kazali, evo pustili smo ljude da se obrate i da pređemo preko toga. Ja bih vas molio i zaista bih tražio da Kolegij u pauzi napravi jedan radni sastanak da pozovemo gđina da djecu pustimo i da Kolegij nađe načina odnosno da probamo iznaći sredstva i da nam se prezentira koja su to sredstva potrebna za ovu djecu. Ne bježimo zaista od odgovornosti da takav zaključak donesemo. Evo ja bih vas molio da u pauzi napravimo radni sastanak odnosno Kolegij i da pozovemo i ministra finansija i Turkovića iz ZZO i gđina kako bi mogli iznaći dodatna sredstva za liječenje djece. Hvala.

Predsjedateljica:

jedan trenutak, bojim se da ćemo sada ovu temu, mislim da vam je prijedlog odličan. Da ne razvodnimo sada ovu temu da nastavljamo. Evo i ministrica Ademaj također traži da se obrati po ovom pitanju, izvolite ministrice pa da ipak nastavimo sa radom. Ja se slažem da djeca trebaju da idu da se ne maltretiraju i da gđin ostane pa ćemo, izvolite uvažena ministrice Ademaj.

Ministrica Zilha Ademaj:

Zahvaljujem gđo predsjedavajuća. Pozdravljam cijenjene zastupnike i ostale prisutne u skupštinskim klupama, naše drage gledatelje i goste. Ja imam potrebu da dam neka pojašnjenja u vezi sa ovim što je uvaženi dr. Mujić istakao, vezano je za terapiju djece dijabetičara. Mislim da su ovdje neka pitanja pogrešno adresirana, kada su u pitanju djeca dijabetičari i nabavka aparata i trakica za šećer, to je vjerovatno vam je svima poznato federalni program i nabavljaju se putem Federalnog ZZO. Kanton Sarajevo vrši nabavku aparata i trakica za odrasle ali ne i za djecu do 18 godina, to je federalni program. Što se tiče inicijative o kojoj je dr Mujić govorio, Ministarstvo zdravstva čini mi se da je često prozivano Ministarstvo zdravstva i ministrica. Mi smo apsolutno podržali inicijativu kada su u pitanju aparati za kontinuirano mjerenje šećera u krvi u javnosti bolje poznati kao senzori. Međutim ja moram ovdje istaći da ti aparati još uvijek u BIH nisu registrirani, mi smo kontaktirali Agenciju za lijekove i medicinska sredstva sa sjedištem u Banjaluci, da provjerimo da li postoji i jedan od proizvođača ovih aparata koji ima interes da te aparate prometuje u BIH. Na žalost, do sada, a nema takvih proizvođača puno, ja moram istaći da je do sada jedini nama poznat Abot, koji proizvodi te aparate nije iskazao interes da te aparate prometuje na području BIH, vjerovatno iz razloga što smo mi malo tržište za takve proizvođače i nema interesa da se registriraju. Što se tiče zahtjeva za interventni uvoz, ja moram također istaći da interventni uvoz ne može odobravati kanton. To je isključivo nadležnost FBiH, odnosno Federalnog Ministarstva zdravstva. Spomenuto je pitanje Glukagona. To je lijek koji doduše nije skup i koji za naš budžet, odnosno budžet ZZO ne predstavlja nikakav finansijski teret, ali taj lijek je propisan na Federalnog listi na bolničkoj listi. Tako da su bolnice u obavezi obezbjediti taj lijek i on mora biti dostupan svakom djetetu i u svakom trenutku. Dakle nije u pitanju

kantonalne liste lijekova koji se izdaju na recept. Ja ne znam zašto je Udruženje dijabetičara i konkretno dr Mujić ovoliko ogorčen na Kanton Sarajevo, mislim da smo sve učinili i naročito kada je u pitanju ova populacija i naročito kada su u pitanju djeca da neke dosadašnje anomalije popravimo novom Uredbom. Vi znate da Uredba o ortopedskim i drugim funkcionalnim medicinskim sredstvima nije mijenjanja od 2007 godine i da smo je donijeli sada na Vladi 22.juna. Kojom smo bitno proširili prava i sadržaj medicinskih sredstava. Uredba je uključila novih 40 raznih funkcionalnih medicinskih sredstava, koji su također, ali evo ja neću uopće spominjati to dodatno finansijsko opterećenje. Vi ćete vidjeti i kroz Rebalans finansijskoga plana ZZO da smo predvidjeli i dodatna sredstva za proširenje tih prava po ovoj Uredbi. Kada je u pitanju Uredba, i kada su u pitanju dijabetičari, uredbom je predviđena nabavka inzulinskih pumpi do 26 godine života, do sada je to bilo do 18 godine. Do sada nije poslije 26 godine nabavljao materijal za punjenje pumpi na teret obaveznog zdravstvenog osiguranja, a sada novom uredbom je predviđao da se materijal nabavlja trajno kontinuirano i iznad 26 godine života. To je značajno poboljšanje u odnosu na postojeću uredbu. Dakle to 26 godine nabavka pumpi a iza 26 godine trajno nabavka kompletnog potrošnog materijala i punjenje pumpi. Uredbu su također unešeni kao obaveza i kao norma da se nabavljaju i senzori s tim što evo moram ponoviti da oni još uvijek nisu registrirani i da se naravno to mora dogovoriti sa Federacijom s obzirom da je federalni program nabavka trakica i aparata za djecu do 18 godina. Ako će to preuzeti kantoni, onda će kantoni prestati dijelom finansirati iz doprinosa Federaciju po ovom osnovu za nabavku aparata za kontinuirano mjerenje šećera. Ja zaista ne vidim u čemu je bio propust i Ministarstva i kantonalne Vlade pored ovoliko značajnih pomaka i lijekovi i kada su u pitanju ortopedska i druga medicinska funkcionalna pomagala i naročito jada u u pitanju jeca i posebno ističem dijabetičare. Ja želim ovdje istaći također da recimo na listi lijekova koja je reda veličine oko 70 miliona godišnje, da najveći dio sredstava se izdvaja za dijabetes skoro 30% od vrijednosti te liste. Niko ovdje nije postavio pitanje sredstava iako su sredstva uvijek ograničavajuća. A vi ćete vidjeti sada kroz rebalans finansijskog plana da su značajno povećana sredstva i za ortopedska i druga pomagala, i za lijekove i za posebne programe lijekova, njih je čak 10, posebnih programa za one lijekove koji nisu uključeni u Federalnu i kantonalnu listu.

Predsjedateljica:

poslovnička intervencija. Uvaženi zastupnik Kojović.

Poslanik/zastupnik Predrag Kojović:

zahvaljujem. Predsjedavajuća imam osjećaj da se ovo sada pretvorilo u raspravu o ovoj tački dnevnog reda. Ja sam razumio da eventualno ministra želi replicirati na izlaganje doktora, ali ovo je vremenski daleko prevazišlo ono što je predviđeno za repliku i otvorila se diskusija. I sada i mi imamo potrebu da reagujemo na stvari koje ministrica rekla i defakto raspravljamo o tački dnevnog reda za koju smo rekli da je broj 12. pa vas nekako molim. Ili da stavimo, ja predlažem da stavimo ako hoćete ovu tačku i da nastavimo, kako bih rekao, s obzirima da je prirodno da nastavimo diskutovati dok su ljudi prisutni tu itd.

Predsjedateljica:

hvala lijepo uvaženi zastupniče Kojović.

Ministrica Zilha Ademaj:

evo ja sam završila. Imala sam potrebu da kažem ovo da su zaista napravljeni značajni napreci i poboljšanja kada je u pitanju Uredba i kada su u pitanju djeca sa dijabetesom. Ja evo mogu završiti i proširiti svoju priču kada se bude razgovaralo o rebalansu da kažem koliko je sve dodatno izdvojeno sredstava i za koje namjene. Hvala.

Predsjedateljica:

hvala lijepo ministrice Ademaj. Mislim da smo, samo malo, samo trenutak niste dobili riječ. Dakle mi smo se kao Skupština dogovorili da ćemo napraviti pauzu i razgovarati o svemu ovome, na Kolegiju, prema tome ja predlažem da nastavimo da radimo sa našim dnevnim redom, uvaženi zastupniče Pindžo imate poslovničku intervenciju izvolite.

Predsjedateljica:

zahvaljujem predsjedavajuća. Neću ponavljati ono što je povreda poslovnika jer je kolega Kojović to rekao i prekinuo ovo. Mi imamo sada izbor. Ili ćemo se praviti ludi i nastaviti raditi isto kao da se ništa nije desilo, kao da niko ništa nije izgovorio, ili ćemo sada napraviti pauzu, sazvati sjednicu kolegija pozvati sve relevantne predstavnike udruženja da vidimo šta se eto dešava, jer ja sam pogledao uredbu Vladinu uredbu iz 2007, pogledao sam mišljenje ministra tadašnjeg zdravlja koji je kršio tu uredbu, pogledao sam inicijativu Udruženja koja je finansijski obrazložena i dobro potkovan i sada slušam ministricu priča nam bajke. Ako vi nećete dati pauzu i sazvati Kolegij uz poziv ministrici, direktoru Zavoda i predstavnicima udruženja da ovu stvar raščistimo i da imamo spremljen eventualni amandman koji bi Vlada usvojila da dođe na dnevni red Prijedlog rebalansa finansijskog plana ZZO onda ću ja zatražiti u ime Kluba pauzu 30 minuta.

Predsjedateljica:

molim vas nemojte dobacivati iz sale, pogotovo gosti. Dakle mi ćemo svakako napraviti pauzu. Za taj poziv nam treba vrijeme. Treba nam vrijeme da zovnemo direktora. Izvolite uvaženi zastupniče Pindžo.

Poslanik/zastupnik Mirsad Pindžo:

ja sam bio vrlo jasan predsjedavajuća, ako vi nećete dati pauzu da rješavamo problem, i ako vi smatrate da ima nešto važnije da mi postavljamo pitanje i vodimo političku propagandu ili saznamo neke informacije od ove naše djece onda ja tražim pola sata pauzu da to probamo razriješiti i tražit ćemo je sve dotle dok se ovo ne razriješi i nećemo nastaviti današnju sjednicu dok ne budemo imali nekakav stav jer ću svaki put kada uđemo u salu tražiti ponovo pauzu. Ja tražim da se sada ovog momenta zakaže sjednica Kolegija i da raspravljamo o ovoj temi da probamo naći rješenje, jer ako doktor koji o tome zna više od nas sviju, kaže jedno a mi.

Predsjedateljica:

dobit ćete pauzu evo odmah i nemojte mi skakati u riječ. Uvaženi zastupnik Zvonko Marić poslovnička intervencija.

Poslanik/zastupnik Zvonko Marić:

zahvaljujem predsjedavajuća. Budući da je ovakav razvoj događaja ja ne vidim potrebu da tražimo sada bilo kakvu pauzu nego da nastavimo raspravu u ovo tonu da bi se sazvali direktori zavoda i za to vrijeme dok oni dođu onda se upriliči Kolegij na tome raspravljam. Poslije ovakvog vapaja bojim se da će gledateljstvo steći dojam da mi ignoriramo ovakvu vrstu vapaja koji je sasvim dovoljan za reakciju i skupštine i Vlade. Dakle kada smo već otvorili.

Predsjedateljica:

naravno, mi i te kako cijenimo sve ovo što se dešava, naravno ispoštovati ćemo i ono što uvaženi zastupnik ispred Kluba traži pauzu. Dobit ćete sve. Poslovnička intervencija. Izvolite. Čelik.

Poslanik/zastupnik Mirza Čelik:

predsjedateljice, kada šef Kluba zastupnika bilo koje parlamentarne grupe traži pauzu vi je morate dati po Poslovniku. Kolega Pindžo je tražio pola sata pauzu vi kažete da bez odlaganja, znači bez rasprave. Ne morate obrazlagati. Zakažite sjednicu Kolegija i napravite pauzu pola sata. Hvala.

Predsjedateljica:

nisam rekla da ne dam bilo je nekoliko poslovnčkih intervencija. Moramo to ispoštovati. Evo pauza pola sata.

NASTAVAK NAKON PAUZE

Predsjedateljica:

nastavljamo sa radom. Samo malo tišine. Nastavljamo sa radom. Evo nakon zasjedanja Kolegija koji je donio neke zaključke, evo ja ću zamoliti uvaženog zastupnika Mirsada Pindžu da obrazloži pauzu. Izvolite.

Poslanik/zastupnik Mirsad Pindžo:

zahvaljujem predsjedavajuća. Evo samo informacija- u pauzi zasjedanja održana je sjednica Kolegija na kojoj su bili prisutni i premijer, ministrica zdravstva, direktor ZZO, kolega Kozadra koji se dugo bavi time i moram reći i izraziti zadovoljstvo da je jednoglasno opredjeljenje Kolegija da se danas riješi taj problem. Zaključak Kolegija je sljedeći: u dva koraka sada upravo u ovom momentu ministrica zdravlja, direktor ZZO, predstavnik Udruženja Primarijus dr. Mujić i naš uvaženi kolega Kozadra sjede i usaglašavaju i pišu zaključke o kojima će se ova skupština izjasniti kao prvi korak što će biti podloga Vladi da u pazi zasjedanja predloži amandmane na izmjene i dopune Finansijskog plana ZZO da bi danas završili pravu priču, pa i po cijenu ako treba da se i Uredba mijenja da i to predlože u kom dijelu da se mijenja. Nadam se da ćemo danas konačno bar malo olakšati i pomoći ovoj kategoriji ugroženoj da lakše podnose i bore se sa svojom bolešću. Eto hvala vam.

Predsjedateljica:

hvala vam lijepo uvaženi zastupniče Pindžo. Mi nastavljamo s radom. A to su:

AD – 1.

ZASTUPNIČKA PITANJA I INICIJATIVE

Za pitanje po ovoj tački javio se uvaženi zastupnik Dževad Rađo izvolite.

Poslanik/zastupnik Dževad Rađo:

hvala lijepo. Pozdravljam vas, vaše saradnike, kolegice i kolege, članove Vlade, ministricu i ministre, naše cijenjene goste i na samom početku izražavam zadovoljstvo što ćemo doći ako bog da danas završimo ovaj problem oboljelih od dijabetesa tip 1, o čemu je govorio gospodin Pindžo. Želim iskazati ozbiljno nezadovoljstvo činjenicom da Vlada Kantona Sarajevo nije adekvatno reagovala na moju inicijativu i postavljeno pitanje vezano za donošenje odluke zaštite izvorišta Sarajevsko polje u smislu stvarnog rješavanja problema. S obzirom da smo Klub i ja u više navrata postavljali pitanje i davali prijedloge vezani sa 8



Predsjedateljica:

hvala lijepo uvaženi ministre Nenadiću. Ispravka krivog navoda uvaženi zastupnik Pindžo. Izvolite.

Poslanik/zastupnik Mirsad Pindžo:

zahvaljujem predsjedavajuća, morao sam ponovo reagovati da ispravim navode netačne navode koje je premijer dao. Ova Skupština je odbila Izvještaj o poslovanju ZOI 84 za 2014, tačno u sazivu prethodne Vlade koju je vodio Elmedin Konaković. Nakon toga, šta je Vlada radila jel pokušavala, kakvo je u Vladi glasanje bilo da se izvrši taj nalog Skupštine, ne znam. Ali znam sljedeće, nakon medijskih natpisa da nije podržan premijer Konaković u namjeri da sprovede Odluku Skupštine o smjeni uprave ZOI, u ovoj Skupštini je podnesena inicijativa i izglasana većinom, ne opozicija, nego većina u ovoj Skupštini izglasala inicijativu i obavezala Vladu Kantona Sarajevo na čijem čelu je Adem Zolj da smijeni upravu preduzeća ZOI'84 što je Vlada nije uradila, nije ispoštovala odluku Skupštine, nego je razriješila upravu ZOI-a na način da se razrješava zbog odlaska na drugu dužnost u drugu ustanovu na nivou kantona. Kako je to premijer može obrazložiti provođenjem zaključka ove Skupštine, većinske jer Skupština Kantona Sarajevo kao najveći zakonodavni organ koji bira Vladu je poslodavac Vladi. Ako niste dobili zaključak Skupštine, onda je to vaša stvar, ali ja vas molim, evo sada tražim i pismeni odgovor na ovo pošto se usmeno odgovarate. Ovo što je ministar Šabić govorio ne želim uopšte komentarisati. Ja sam to nazvao imam argumentaciju za to, ali da ne gubimo vrijeme i da ne zloupotrebjavam Poslovnik neću dalje. Znači tražim od premijera pismeni odgovor kako je to provedena odluka Skupštine ovom radnjom razrješanjem i imenovanjem na drugu poziciju? Hvala.

Predsjedateljica:

hvala lijepo. Zastupnice Mehmedagić vi ste već bili dva puta, ne može po Poslovniku biti. Odgovorit će vam pismeno. Dakle dobili smo u pismenoj formi zastupničku inicijativu od uvaženog zastupnika Okerića da se izjasnimo, on nije stigao tu rečenicu da pročita, pa evo dao nam je ovu inicijativu da se mi kao Skupština izjasnimo. Poslovnička intervencija uvaženi zastupnik Čelik, izvolite.

Poslanik/zastupnik Mirza Čelik:

zahvaljujem predsjedateljice. Mi u svakom slučaju ovo moramo proslijediti Vladi jer ovo iziskuje dodatna finansijska sredstva za realizaciju ovakve inicijative. Vlada se mora izjasniti po osnovu zastupničke inicijative i tek nakon toga možemo dati na glasanje. Hvala.

Predsjedateljica:

moje je da kažem. Iscrpili smo prvu tačku dnevnog reda. Dobili smo zaključke Kolegija, koji su vezani za Inicijativu Udruženja dijabetičara djece i omladine Kantona Sarajevo. Pa je moja dužnost da pročitam ove zaključke a oni su sljedeći:

1. da se lijek Glukogan osigura svim pacijentima inzulo-ovisnicima a za sve koje je utvrđena medicinska indikacija za upotrebu lijeka, a isti nije obezbijeden kroz bolničko liječenje, osigura kroz prosječan program protokol na teret sredstava obaveznog osiguranja, a preko ZZO Kantona Sarajevo.
2. Da se kroz Izmjene i dopune Budžeta Kantona Sarajevo obezbijedi 300.000 KM za nabavku inzulinskih pumpi za novootkrivene slučajeve inzulo-ovisnike i zamjenske pumpe do utroška navedenih sredstava za registrirane inzulo-ovisnike za 2018 godinu. Interventno. A od 2019 i narednih godina se sredstva osiguravaju iz obaveznog zdravstvenog osiguranja odnosno da ih ZZO Kantona Sarajevo finansira, u kontinuitetu u skladu sa Uredbom.

3. Nabavka senzora, odnosno aparata za mjerenje šećera krvi će se vršiti na teret sredstava obaveznog osiguranja u skladu sa Uredbom o funkcionalnim sredstvima s tim što se navedeni aparati reguliraju u Agenciji za lijekove i medicinska sredstva BIH.
4. Da se aparati i 10 trakica godišnje za mjerenje ketona u krvi obezbijede za svakog inzulo-ovisnika do 26 godina na teret ZZO Kantona Sarajevo shodno raspoložim finansijskim sredstvima ZZO Kantona Sarajevo.

Evo to su ti zaključci. Molim vas da pristupimo.

Poslanička intervencija. Izvolite uvaženi zastupniče Pindžo.

Poslanik/zastupnik Mirsad Pindžo:

samo jedna intervencija. Predlažem da se u zaključku 4. stavi točka iza ZZO Kantona Sarajevo. A da se briše "shodno raspoloživim finansijskim sredstvima Zavoda" jer ako ovo ostane onda je to na volju hoće li il neće. A malo sam se raspitao to je vrijednost 10.000 KM i za najteže bolesnike i nema potrebe da ovo na kraju stoji ova rečenica. Hvala.

Predsjedateljica:

znači briše se ovo "shodno" ova zadnja. Dobro. Uvaženi zastupnik Mešanović vi ste tražili riječ.

Poslanik/zastupnik Safet Mešanović:

naravno evo kolega Pindžo je to rekao i ja sam po istom pitanju htio intervenisati. Ali nema potrebe i ja isto predlažem. Hvala.

Predsjedateljica:

molim vas pristupite glasanju. Sa ovim brisanjem, naravno. Zaključujem glasanje i konstatiram 29 je bilo ZA, protiv nije bio nitko i suzdržan nitko. Dakle, Skupština usvojila zaključke Kolegija na osnovu Udruženja dijabetičara djece i omladine Kantona Sarajevo.

Obzirom da je sada. Ja predlažem da sada napravimo. Informacija. Sada prelazimo na

AD – 2.

A) INFORMACIJA O REALIZACIJI MJERA ZA SANACIJU I REORGANIZACIJU KJKP „GRAS“ D.O.O. SARAJEVO ;

B) INFORMACIJA UPRAVE KJKP „VODOVOD I KANALIZACIJA” D.O.O SARAJEVO ZA PERIOD OD 25.04.2018. GODINE DO 31.05.2018. GODINE, SA IZVJEŠTAJIMA O RADU SKUPŠTINE I NADZORNOG ODBORA PREDUZEĆA;

a)

Prelazimo prvo na Informaciju o realizaciji mjera za sanaciju i reorganizaciju KJKP „GRAS“ d.o.o. Sarajevo
dakle prvo GRAS, vrlo kratko i konkretno. Izvolite uvaženi ministre Fišo.

Ministar Mujo Fišo: UVODNO IZLAGANJE

Predsjedateljica: